

Durchdraht

Am *Montag* vor Acht, da schleicht er in d' Schui
Sie wart'n auf eahm scho – es san ganz schee vui
Sie kreis'n eahm ei – eahm zittern die Knia
Er hat doch nix g'macht und er kann nix dafia,
dass er ned so is, wias andere woin
Drum muass er tagtäglich am Schuihof bezoin
Sie spuck'n eahm o – sie haun eahm ganz blau
Er woant und er schreit, doch es huift eahm koa Sau

Er hod durchdraht – Er is durchdraht

Dahoam fragt sei Muatta: „Was isn passiert?
Hams dir's Pausenbrot wieda in d' Hoar eini g'schmiert?“
Jetzt setz di hoid durch – ja kreizkruzifix
Dass i mit deem Lehrer red, bringt scheinbar nix
Da Vata schreit: „Durchsetz'n? – Schau eahm doch o
Aus dem wird doch niamois a richtiga Mo
Ois i grad so oid war, da war i scho wer
und koa so verweichlichter Schwächling wia der“

Er hod durchdraht – Er is durchdraht

Sei Lehrer hat g'sagt: „Du bringst es ned weit
Wer so schlechte Noten hat, der is ned g'scheit
Doch was in seim Buach steht, des kann er ned wissn
Sie ham eahm die Seit'n ausm Buach aussu g'rissn
Sein Ranz'n hams g'stoin – seine Heft hams versaut
Er hofft, dass da Lehrer eahm diesmoi vertraut
Aber der moant blos: „Depp, was hast da wieda g'macht
Dafia kriegst an Verweis“ – Und die ganze Klass lacht

Er hod durchdraht – Er is durchdraht

Er hod durchdraht – Er is durchdraht

Am Wochenend sitzt er alloa vorm *PC*
und duad da zur Abwechslung andern moi weh
Da schiaßt er auf ois, was si vor eahm bewegt
Da wird jedes *Moorhuhn* vom Bildschirm gefegt
Da is er *Hulk Hogan*, der mi'm *Macho Man* catcht
Da is er *Darth Vader*, der des Böse zerquetscht
Und auf oamoi, da g'spiart er: Jetzt is es soweit
Da Rambo muass her und Gerechtigkeit

Er hod durchdraht – Er is durchdraht

Sei Vata is Jager und stoiz is er drauf
Da Bua sperrt am *Montag* den Waffenschrank auf
Er hoit in die Händ des voi g'ladene G'wehr
und nimmt si vor, er is koa Feigling mehr
Am Schuihof, da wartens scho wieda auf eahm
Er schiaßt wuid drauf los – kann nix sehn und nix hearn
Des G'wehr gibt eahm Macht, er is couragiert
Er metzelt ois nieda, bis si nix mehr rihrt

**Er hod durchdraht – Er is durchdraht
Er hod durchdraht – Er is durchdraht**

Auf oamoi is schdaad – so schdaad wia die Nacht
Jetzt wird's eahm bewusst: Was hat er da g'macht
Er schaut in den G'wehrlauf – er woäß: Jetzt is Schluss
Spannt nomoi den Abzug und gibt si den letzt'n Schuss

**Text und Musik
Michael Bohmann
03 / 2003**